

YI MBI EKA'N TAN YI BAUTISMO



Escrito originalmente por Enrique McArthur
Aguacatán, Huehuetenango

Segunda Edición Diciembre de 2019
100 copias impresas ©
Editado por: Josue Pérez Velásquez
Información: (502) 5892 7644

YI CHUSU'N YI AT TUL YI LIWRE'J

Yi Bautismo.....	1
Tan qui tele'n yi kachusun te ac'u'l.....	4
¿Na' scyetz e' yi ba'n chibanlij bautizar?.....	6
¿Tona' ba'n je' a' twi' jun?	7
Tan qui tele'n yi kachusun te ac'u'l.....	8
¿Na' na chopone't yi chinitxajil yi e' creyent yi txe'n chibanlij bautizar yi na chiquim? ..	8
¿Mbi tzuntz yi qui na chibanlij bautizar yi chinitxajil yi e' creyent te tal ni'e't e'?	8
¿Mbi'tz tajwe'n yil tocsaj jun creyent yil ban tane'n yi bautismo?	9
¿Xe'n lkaban tan stzatzine'n Kataj Ryos ske'j te yi itz'o'?	9
Yi mero xe' cyakil yi ca'wl Kataj	10
¿Xe'n lkaban tan nachle'n Kataj?	10
¿Xe'n lkaban tan colche'n yi chusu'n yi na kocsaj, nin xe'n lkaban tan chiquiwse'n yi e' yi na cabej chic'u'l?.....	11
Tan qui tele'n yi kachusun te ac'u'l.....	11

Xe'tzibil yi Chusu'n

Yi jun chusu'ne'j i'tz jun xtxolbil yi ja tz'ibxij tan Ta' Enric le yob 1,998 nin te yi tiempa'tz, ja banlij imprimir jun cient folletos le imprenta Mam San Sebastián H, luquen chumpul, ya'stzun bajx tir bnixe'n yi jun chusu'ne'j.

Ma jalu', ba'n xcon yi jun u'je'j tan chichusle'n cyakil cmon te yi mero xtxolbil yi mbi eka'n tan yi bautismo. Ej nin cuj yil xcon cyak'un yi e' kajwutz yi txant tan chibnol tane'n yi chibautismo.

At kajwutz yi ja el yi xe' yi e'chk chusu'n te chi c'u'l; ba'n bin xcon yi chusu'ne'j tan chichusle'n, bantz cya'l jun cyaj wutz coc.

Yi bautismo i'tz jun balaj xtxolbil yi chin tajwe'n cunin tz'el katxum tetz yi mbi jopij ta'n. I'tz jun xtxolbil yi qui'c rmeril tz'el te kac'u'l, cyakil o' yi o' len me'l cy'ajl Ryos.

Quiwit bin, tan xome'n te Kajcaw Jesucristo.

Yi Bautismo

1. ¿Mbi na elpont nin mbi eka'n ta'n?

Ma jalu', te yi kachusune'j kocpon tan txumle'n yi Bautismo, yi mbi na elpont nin mbi xac. Tan tele'n katxum tetz yi Bautismo, tajwe'n katxum mu'x tal yi e'chk bautismo yi na jal ka'n le Yol Kataj.

Tul 1 Corintios 10:2 na tal sketz yi e' yi e' banlij bautizar i'tz tan chichajol yi xomche' te xchusu'n Moisés. Ncha'tz o' ketz yi na kabanlij bautizar, na xchaj yi ja bixe' ka'n tan kaxome'n te Jesucristo.

Ya'stzun ban Wa'n Bautist tul Lucas 3:3 na tal:

“Toque'n tzun i' (Wa'n Bautist) tan txole'n yi tajbil Ryos lakak e'chk ama'l naka'jil yi a' Jordán. Nin octz tan txole'n scyetz wunak yi ba'n je' a' xchiwi' **tan xchajle'n yi bintzijnin ja chitx'ixpuj cyajtza'kl**. Nin ncha'tz tal i' yi ko ya'tz chiban sjalok tzun cuybil chipaj swutz Ryos.”

Ncha'tz jalu', yi na kabanlij bautizar, na xchaj yi ja bixe' ka'n tan cyaje'n cyen kilol yi e'chk takle'n cachi' yi nkaban cyen nin yi skaxomok te Cristo. Yi ko jun cu'n ya'tz kaban, nin ko na kocsaj cunin yi ja quim Crist tetz kaxel, scuye' tzun Kataj Ryos kapajtz.

Je yol Jesucristoje'j tul Mateo 28:19, 20:

19 Cha'stzun te quibene'nk xchixo'l cyakil jilwutz wunak bene'n tzi'n wi munt. Chuswoke' te werinchusu'n; nin banwoke' bautizar tan bi' Intaj, nin tan wetz imbi' yi in Cy'ajol, tu yi bi' yi Espíritu Sant.

20 Chuswoke' yi tajwe'n tan chibnol tane'n cyakil yi ca'wl yi alijt wa'n tzitetz. Ba'n k'uke' ic'u'l yi xomchin tzite'j jalen yil tzaj wi' yi tiempe'j, —stzun Jesús bantz scyetz. Amén.

Na elpont yi tajwe'n yi bautismo, na tul yi versículo 18 na tal Jesús:

“—Ak'ij wetz ink'ej tan cawu'n tcyaj, nin tan cawu'n wuxtx'otx'.”

Ya'stzun yi mero bintzij, Jesucristo i' yi wi'tz ajcaw nin ja cawun te yi tajwe'n yi banle'n tane'n yi bautismo, nin kol ko'c c'ulutxum jak' ca'wl i', tajwe'n bin kaban tane'n yi bautismo.

Ncha'tz na tal, yi tajwe'n tan kabanle'n bautizar tan bi' Kataj Ryos, tan bi' Jesucristo, nin tan bi' yi Espiritu Sant, tan xchajle'n yi skaxomok te yi ca'wl Ryos. Nin na xchaj yi ja bnix jun trat ka'n tu Ryos yi ntin skaxomok te'j i'.

Yi bautismo yi bajij tane'n scye yi e' aj Israel yi quicy'e'n wi cyak mar na xchaj yi junit e' tu Moisés. Ej nin yi bautismo yi bajij te Wa'n Bautist, i'tz tan xchajle'n yi ja chibisun tan quil.

Yi Kajcaw Jesucrist, bajij bautizar i' tan Wa'n Bautist poro nk'e'tz tan xchajle'n yi na bisun tan til, na qui'c jun tir jajk juch til, nin je tal i'e'j tetz Wa'n.

Mateo 3:15

...Na tajwe'n tan kabnol tane'n cyakil yi tajbil Ryos...

Ej nin tul Lucas 3:23 na jal ka'n yi ja ban Kajcaw Jesús tane'n yi bautismo yi xe'te'n i' te yi munl tzone'j wuxtx'otx', (te yi at i' tul junaklaj yob), yi xchajol tib xchiwutz wunak, na elpont yi bautismo i'tz jun ca'wl yi tajwe'n kaxom te'j te ntaxk kaxcon swutz Kataj Ryos te alchok kamunl.

Ncha'tz o' ketz jalu', tajwe'n tan kabnol tane'n yi bautismo tan xchajle'n yi list o' tan banle'n cyakil yi tajbil Kataj, nin yi scyajk cyen yi ketz kajtza'kl ka'n, nin yi skaxomok te yi xchusu'n Kajcaw Jesucristo.

Ba'n kasi'lej yi Salmo 15 tan tele'n katxum tetz yi e'chk ploj ajtza'kl yi at xchixo'l wunak yi qui na pek' Ryos te'j; ej nin yi ya'stzun eka'n ka'n sajle'n.

Salmos 15

- 1 Wajcaw, ¿na' scyetz e' yi ba'n chinaje' le najbilu', yi chin xanin? ¿Na' scyetz e' yi ba'n chinaje' wi ju'wtz kale najle'tu'?
- 2 Ntin cu'n yi e' yi tz'aknak cu'n, yi e' yi na chiban yi e'chk takle'n balaj, yi e' yi na cyal yi mero bintzij, yi qui'c tx'otx' te chiyol.
- 3 Ntin cu'n e' yi qui na cho'c tan yolche'n junt, yi qui na chinuc' cyen jun e'chk takle'n cachi' te kul cyamiw, yi qui na cyak'e'n jun c'oloy yol te'j kul chiwusin.
- 4 Ntin cu'n e' yi qui na cyak' chik'ej yi e' mal nak, ma na ntin na cyak' chik'ej yi e' yi na cyek xchi'u'. Ntin cu'n e' yi na el chik'ab te chiyol, mpe nink chitz'akon tan paj.
- 5 Ntin cu'n e' yi qui na chijak t'a'al chipu'k yi na cyak' chipu'k tan c'mo'ni'n. Ntin cu'n e' yi qui na chipwokin tan tak'le'n til jun yi qui'c paltil. Cyakil yi e' yil chiban tane'n yi xtxolbila'se'j, quil chipo'tij cyera'tz.

Ezequiel 18:5-9 (te yi tiemp'e'j qui'c traducción le kayol)

- 5 Y el hombre que fuere justo, e hiciere juicio y justicia;
- 6 que no comiere sobre los montes, ni alzare sus ojos a los ídolos de la Casa de Israel, ni violare la mujer de su prójimo, ni se llegare a la mujer menstruosa,
- 7 ni oprimiere a ninguno; al deudor tornare su prenda, no cometiére robo, diere de su pan al hambriento, y cubriere al desnudo con vestido,
- 8 no prestare a interés, ni recibiere más *de lo que hubiere dado*; de la maldad retrajere su mano, e hiciere juicio de verdad entre hombre y hombre,
- 9 en mis ordenanzas caminaré, y guardare mis derechos para hacer *según la verdad*, éste es justo; éste vivirá, dijo el Señor DIOS.

Ncha'tz yi bautismo yi cawun Jesucristo tan kabnol tane'n i'tz tan xchajle'n yi na kabisun tan kil, nin yi ja ko'c jak' ca'wl Kataj Ryos tu yi tetz cy'ajl, nin jak' ca'wl yi Espiritu Sant. Ncha'tz na xchaj yi junit o' tu Cristo nin scyuch' yi e' yi ncha'tz ja bixe' cya'n tan chixome'n te Cristo.

1 Corintios 12:13, 14 na tal:

- 13 Na yi kabaje'n bautizar, junit k'u'j o' nkaban. Nin ite'nin Espiritu yi nko'csan jak' ca'wl. Ma jalu' junit k'u'j o'. Qui'c na ban mpe o'-k judiy nka qui'. Qui'c na ban yi ko o' esclaw nka qui'.
- 14 Cho'n kutane'n ketz yi o' creyent chi tane'n wankil jun yaj. Nk'e'tz yi jun ntzi'-k wekl yi wankil at, ma na ala' len cu'n wekl tane'n poro junit i'. Ni'cu'n tzun kutane'n ketz tk'ab Cristo, junit o'.

Yi bautismo i'tz jun elsawutzil te yi ja kaquim swutz yi il c'ol na ya'stzun na tal Romanos 6:3-5

- 3 ¿Na qui pe' na el chitxumu' tetz yi mbi eka'n tan yi bautismo yi na bajij ske'j yi na kocsaj yi mbi eka'n tan Jesucristo? Na yi na kaben mulij xe a' ni'cu'ntz chi i o'a'tz o' quim yi quime'n Cristo.
- 4 Ej nin ni'cu'ntz chi i o'a'tz o' mukxij yi mukxe'n i' tetz. Na ni'cu'ntz chi quimnako' tane'n. Ma yi na kajetzaj xe a', ni'cu'ntz yi jalk kitz'ij junt tir chi banak Jesucristo yi titz'e'n junt tir tan poder Kataj. Cha'stzun te qui'ct ltajquen ilc'ol ske'j, na o' ac'aj wunak tane'n jalu'.
- 5 I bin jalu', junit bin o' tu Cristo. Na yi quime'n i', ni'cu'ntz chi yi ya'tzk kaquime'n ketz. Yi ko ya'tz, ncha'tz yi titz'e'nt i', ya'stzun yi kitz'e'n ketz. Kok'be'n bin kib tu Cristo jalu'.

Ja quim Cristo tetz kaxel, nin swutz Ryos yi quime'n i', ncha'tz o' ja kaquim, ya'stzun na elpont yi na kaben xe a'; i'tz jun elsawutzil yi ja kaquim nin ja kamukxij. Nin yi na kajetzaj xe a', i'tz jun elsawutzil yi ja kitz'ij junt tir, nin o' ac'aj wunak tane'n.

Ncha'tz yi jun txolbila'tz na xchaj yi ba'n yi na kaben xe a' yi na kabanlij bautizar, na i'tz jun elsawutzil te yi txolbil yi nkasi'lej.

At e' yi ntin na ben tz'itu'n mu'x tal a' xchiwi', nka na je' kojij mu'x tal a' xchiwi', poro qui cunin batz e' yabi'x, nka ya'stzun cyajbil. Yi cmon centroamericano ba'n na kaxom te alchok puntil, ntin kol tz'el cunin katxum tetz yi mero xe' yi xchusu'n Kataj tib yi bautismo.



Tan qui tele'n yi kachusun te ac'u'l

Ba'n xcon laps tan nojse'n yi mbi'tz na tzan jakle'n.

1. ¿Mbi na katzan tan xchajle'n yi na kaban tane'n yi bautismo? Lc 3:3

¿Nin mbi'tz sjalok ka'n swutz Ryos? Lc 3:3

2. ¿Mbi'tz cob txolbil yi tajwe'n kaban, apart te yi "quibene'nk xchixo'l cyakil jilwutz wunak..."? Mt 28:19

3. ¿Na' taw yi ca'wl yi tajwe'n banle'n tane'n yi bautismo, tetz pe' Wa'n Bautist? Mt 3:15

4. ¿Na' scyetz e' yi ba'n chinaje' le najbil Kataj yi chin xanin? Sal 15

Ver 2.

Ver 3.

Ver 4.

Ver 5.

5. ¿Mbi elsawutzil na xcon le 1Cor 12:14 tan xchajle'n yi junit k'u'j o' cyakil o' yi o' len bautizado?

6. ¿Mbi na elpont yi na kaben mulij xe a'? Rom 6:3-5

Ver 3

¿Mbi na elpont yi na kajetzaj xe a'?

Ver 4

Yi na kaban tane'n yi bautismo ¿xe'n na kaban tu Cristo?

Ver 5

2. ¿Na' scyetz e' yi ba'n chibanlij bautizar?

Ntin cu'n yi e' yi na el chitxum tetz yi mbi eka'n tan Jesucristo, nin yi na cyocsaj cunin. Yi xtxolbile'j na jal xe' tul Hechos 8:36-38.

- 36 Itzun te yi na chixontz tbe' chinoje'n pone'n tzuntz te jun a'. Nintzun tal ¹eunuco tetz Li'p: —Je jun a'e'j, ¿at polo' makol wetz tan je'n a' tinwi' tzone'j? —stzun yi eunuco tetz Li'p.
- 37 —Qui'c, —stzun Li'p. —Ntin yi ko tetz cu'n talma'u' na tocsaju' yi mbi eka'n tan Jesucristo, —stzun Li'p tetz. —Jun cu'n na wocsaj yi Jesucristo ya'stzun yi Cy'ajl Ryos, —stzun i' bantz tetz Li'p.
- 38 Nintzun cawunin tan tanewe'n yi carros. Chicwe'n tzuntz chicabil xe a', nintzun je' a' twi' eunuco tan Li'p.

Ncha'tz tul Hechos 10:47-48 na tal yi lajluchaxe'n yi jun cu'n ja cyocsaj Cornelio scyuch' yi e' tetz najal, nin tzun cawun nin Lu' tan chibanle'n bautizar lajke'l.

- 47 Bene'n tzun tlo' Lu' scyetz: —Cya'l jun yi nink xcy'e' tan makle'n tan qui je'n a' xchiwi' yi e' wunake'j na ja bin cu'ul yi Espíritu Sant scye'j, chi bajij ske'j ketz.
- 48 Cawune'n tzun Lu' tan je'n a' xchiwi' cyakil yi e' wunaka'tz tan bi' Kajcaw Jesucristo. Ma yi nsken je' a' xchiwi' cwe'n tzun chiwutz tetz Lu' tan cyaje'n cyen i' cobox k'ej xchixo'l.

Yi xtxolbila'se'j na xchaj sketz yi na tocsaj jun yi mbi eka'n tan Kajcaw Jesucristo ba'n je' a' twi', quil cyaj jun c'oloy tiemp ta'n.

Ncha'tz tul Hechos 16:30-33, na kil yi tocsal cunin yi q'uicy'lom xetze', ja je' a' twi' tuml najal.

- 30 Itzun yi wi't cyele'n tzaj Pawl ta'n xetze' bene'n tzun jakol scyetz: —Ma jalu' ¿mbik tzimban tan inclaxe'n?
- 31 —Tocsaju' yi yol Kajcaw Jesucristo, nin sclaxku' tuml yi najalu', —che'ch Pawl tetz.
- 32 Chitxolil tzun yi yol Kajcaw tetz, scyuch' yi najal i'.
- 33 Toque'n tzun yaj tan tx'ajle'n len yi ticy'le'n xicy'xab scye'j Pawl tu Silas. Nin ite'nin ak'bala'tz yi je'n a' twi' yaj tuml najal.

¹ **Eunuco:** I'tz jun yaj yi qui'c rmeril yi nink witbej tib tujun xna'n, na banij capar i'. Wi'nin tir e' xcon yi e' yaja'tz tan chiq'uicy'le'n yi e' xna'n yi at chik'ej. (Mt 19:12; Hch 8:27-39). Ncha'tz yi yol eunuco, na jop yi e' yi qui na chipo'tzaj quib scye'j xna'n nka yi e' yaj yi tz'aknak cu'n e' swutz Ryos (Ap. 14:4).



Tan qui tele'n yi kachusun te ac'u'l

Ba'n xcon laps tan nojse'n yi mbi'tz na tzan jakle'n.

1. ¿Mbi'tz jun eunuco?

2. Tul Hch 8:37 ¿mbi'tz tal yi eunuco tan bnol tane'n yi bautismo?

3. Tul Hch 16:30-33 ¿jatna' tiemp je't a' xchiwi' yi jun najala'tz?

3. ¿Tona' ba'n je' a' twi' jun?

Tul cyakil e'chk versículo yi ja wi't kasi'lej, na kil yi ko na el xtxum jun te yi mbi eka'n tan Jesucristo, nin jun cu'n na taj yi xom te'j Kataj, qui na taj xch'iwe'n jun c'olaj tiemp.

Yi e' wunaka'tz qui nin chich'i'w yi jalenk cyoque'n tetz tz'aknak cu'n, ma na i'tz tan xchajle'n yi na kaj ko'c jak' ca'wl yi Espiritu Sant.

Yi bautismo i'tz tan xchajle'n yi ja kaclax tan tu' banl talma' Ryos yi nkocsaj cunin.

Efesios 2:8-9 na tal:

8 Tan tu' banl talma' Ryos nkaclaxe't yi k'ukewe'n kac'u'l te'j. Poro quinin kaclax tan tu' yi ketz kabalajil, ma na cotzi'n nkulej tetz Ryos.

9 Na qui na kaclax tan yi e'chk takle'n balaj yi na kaban. Na qui na taj Ryos yi nink kocsaj kib nim.

Romanos 10:9, 10 na tal:

9 Na kol kal len scyetz wunak: "Jesús, ya'stzun yi wetz Wajcaw," nin kol kocsaj cunin yi Ryos je'san tzaj (Jesucristo) xchixo'l alma', skaclaxok tzuntz.

10 Poro tajwe'n yi tetz cu'n kalma' yil kocsaj yi yol i', bantz jale'n kabalajil swutz Ryos. Ej nin ko na kaj kaclax, tajwe'n yil kal (xchiwutz wunak) yi Jesucristo i' Kajcaw.

Te ntaxk kaben xe a', na jak yi pastor sketz yi ko jun cu'n na kaj kaxom te Jesucristo, nin ya'stzun yi tiemp tan kalol xchiwutz cyakil cu'n yi mbi'tz na kocsaj.



Tan qui tele'n yi kachusun te ac'u'l

Ba'n xcon laps tan nojse'n yi mbi'tz na tzan jakle'n.

1. ¿Mbi tzuntz qui na kaclax tan e'chk takle'n balaj yi na kaban? Ef 2:9

2. Quib na tal Rom 10:9 ¿mbi'tz tajwe'n tan kalol nin mbi'tz tajwe'n tan kocsal tan kaclaxe'n?

4. ¿Na' na chopone't yi chinitxajil yi e' creyent yi txe'n chibanlij bautizar yi na chiquim?

Cho'n na chupon te'j Ryos Mateo 19:14 na tal:

Bene'n tzun tlo' Jesús scyetz: —Ak'wok ama'l scyetz yi e' nitxa' tan cyule'n swe'j. Quil tzimakwok chiwutz. Na cyakil yi e' yi cho'n tane'n chic'ulutxumil chi tane'n chic'ulutxumil yi e' nitxa'e'j, ya'stzun yi e' yi ate' tk'ab Ryos, —stzun Jesús bantz scyetz.

Na el katxum tetz yi e' tal nitxa' ntaxk el chitxum tan juchle'n il. Qui'c cyajtza'kl tan banle'n e'chk takle'n cachi', na tzun chiclax tan Ryos. Ite'nin na bajij te jun ni' yi ntaxk jal xtxumu'n yi na quim.

5. ¿Mbi tzuntz yi qui na chibanlij bautizar yi chinitxajil yi e' creyent te tal ni'e't e'?

I'tz tan paj yi jun ni' txe'n pujx ta'n yi mbi na bajij, nin quil xcy'e' tan talche'n "na wocsaj Jesucristo". Cha'stzun te na kach'iw jalen yil tz'ul tajtza'kl tan tlo' tetz cu'n talma' ko na tocsaj Jesucristo nka qui'.

Poro kol quim jun chinitxajil jun lmuj creyent sclaxok yi ni', na sjalok banl tan tu' yi e' creyent yi e' taj xtxu'. Tul 1 Corintios 7:14 na tal, ko ntin jun scyetz yi e' taj xtxu' creyent, sjalok banl jun ni' yil quim yi ntaxk ul tajtza'kl.

Na ko nk'e'tz creyent yi yaj, ilenin at banl Kataj squibaj na cyok'be'n quib. Na tan tu' yi creyent yi xna'n, at banl Kataj squibaj. Ncha'tz mpe ik yi xna'n yi qui na tocsaj, stk'e' Kataj banl squibaj na cyok'be'nt quib. Ma yi qui'k, qui'c klo' banl Kataj squibaj chinitxa'.

6. ¿Mbi'tz tajwe'n yil tocsaj jun creyent yil ban tane'n yi bautismo?

Yi na kocsaj (credo):

- Na wocsaj yi Kataj Ryos cya'l jun na xcy'e' cyen te'j, nin na wocsaj yi i' bnol tetz yi tcya'j tu yi wuxtx'otx'.
- Na wocsaj yi Jesucristo i' yi jun tal x̄utuj cy'ajl Kataj, nin i' cawl ketz.
- Na wocsaj yi ja oc lac'p twankil Mariy tan poder yi Espiritu Sant, ja je' swutz pasyon, quim I', nin mukxij, nin ja itz'ij junt tir le toxi'n ke'j. Ma jalu' cho'n at i' tcya'j, c'olchij le sbal Kataj yi juna'tz yi cya'l na xcy'e' cyen te'j.
- Na wocsaj yi tz'ul i' junt tir le wi'tzibil tiemp tan kicy'le'nin, nin tan tak'le'n chicaws yi e' yi qui nin k'uke' chic'u'l te'j, qui'c na ban yi ko quimnake'.
- Na wocsaj yi at yi Espiritu Sant nin yi xomij swe'j jalu'.
- Na wocsaj yi at jun cmon Cristo tzone'j wuxtx'otx', nin na wocsaj yi tajwe'n ljal lok' ib skaxo'l yi o' ketz yi o' jun te yi cmona'tz.
- Na wocsaj yi at cuybil kapaj, nin yi at itz'e'n junt tir x̄chixo'l alma' tu junt ac'aj kawankil.
- Na wocsaj yi at jun itz'ajbil yi qui bajsbe'n tetz, tetz ketz yi o' yi k'uklij kac'u'l te Jesucristo.

7. ¿Xe'n lkaban tan stzatzine'n Kataj Ryos ske'j te yi itz'o'?

Yi lajuy ca'wl na x̄chaj yi mbi'tz e'chk takle'n yi qui na pek' Kataj Ryos te'j. Yi mero tajbil Kataj i'tz yil kaxom te'j; yil kaban tane'n yi e'chk ca'wla'tz.

Yi lajuy ca'wl yi at tul Exodo 20:1-21:

1. Quil tzitak' k'ej junt Ryos, ma na ntin in.
2. Quil tziban wok teblal jun takle'n tan itk'ol wok k'ej.
3. Quil tzina'wsaj wok imbi' tan cha'tz tu', na swak'e' icaws ko ya'tz.
4. Banwok tane'n yi jun k'ej ujle'n na xansa'nt wa'n.
5. Lok'wok itaj itxu' tan bene'n x̄kon itientp yi ak'ij wa'n tzitetz tzone'j wuxtx'otx'.
6. Quil cxbiyolnakin.
7. Quil cxjopon wutzaj.
8. Quil cxalk'ij.
9. Quil tzijalwok cu'n jun wi itak' te'j junt wunak.
10. Quil tz'elnin italma' te yi mebi'l junt. Quil tz'el italma' te yi txkel, nka te yi mos nka te yi tawun nka alchok e'chk takle'n yi at tuch'.

8. Yi mero xe' cyakil yi ca'wl Kataj

Tul Mateo 22:36-40 na tal:

- 36 —I bin jalu' ta', txo'l cyakil yi e'chk ca'wl, ¿na' scyetz jun yi mas tajwe'n tan kabnol tane'n?
- 37 Saje'n tzun stza'wel Jesús tetz: —'Lok'aj yi aRyosil tetz cu'n awalma', nin tetz cu'n awajtza'kl.'
- 38 Ya'stzun ca'wl yi mas tajwe'n tan banle'n tane'n.
- 39 Ej nin ni'cu'n mu'x tal yi ca'p yi na tal: 'Lok'we' yi e' wunak chi na alok' awib atz.'
- 40 Yi cob ca'wle'j na jop cyakil yi e'chk ca'wl yi tz'iba'nt cyen tan Moisés, nin na jop chichusu'n cyakil yi e' elsanl stzi' Ryos tentz.

Quil tz'el te kac'u'l yi e'chk txolbil te yi yol Kataj, na na jilon sketz tan kachusle'n. Yi tajb'il I', i'tz yil ko'c c'ulutxum te yi yol I'.

9. ¿Xe'n lkaban tan nachle'n Kataj?

Tul Mateo 6:9-14 na tal:

- 9 Cha'stzun te, yil cho'cu' tan nachle'n Kataj, cho'n cyuleju'e'j: 'Kataj yi atu' tcya'j, wi'nin xanil yi bi'u' Ta'.
- 10 Sajku' tzone'j wuxtx'otx' tan cawu'n skibaj. Cawunku' tzone'j wuxtx'otx', chi na cawunu' tzi'n tcya'j.
- 11 Tak' tzaju' kawa' tetz jalu'.
- 12 Cuye'u' kapaj, chi na kacuy ketz chipaj yi e' mas wunak.
- 13 Quil ko' stzakpninu' le il, ma na make'u' kawutz tan qui kabene'n tul. Na ilu' ajcaw tibaj cyakil. Nin chin chamnin ilu'. Nin at teru' k'aju' ben k'ej ben sak. Amén.'
- 14 "Na kol chicuyu' paj junt yaj, ncha'tz Kataj yi at tcya'j scuye' cyeru' chipaju'. Chij Jesús bantz.

10. ¿Ñe'n lkaban tan colche'n yi chusu'n yi na kocsaj, nin ñe'n lkaban tan chiquiwse'n yi e' yi na cabej chic'u'l?

Je na tal Judas 1:20-22:

20 Cha'stzun te e'u' jun c'oloy wajwutz: Skajunal cu'n kaq'uicy'lej kib, bantz ilenin lpek' Kataj Ryos ske'j. Nin skajunal cu'n kaquiwsaj kib te yi chusu'n yi wi'nin xanil, yi cho'n k'uklij kac'u'l te'j. Nin kanache' Kataj tan poder yi Espíritu Sant. Ej nin ncha'tz, elk kalma' tan ñch'iwe'n yi tulbil Kajcaw Jesucristo na tan tu' yi na el k'ajab ske'j, stk'e' jun itz'ajbil sketz yi qui bajsbe'n tetz.

22 Ncha'tz cho'ku' il tan chiquiwse'n yi e' yi na chicabej chic'u'l te yi na kocsaj, bantz chiclaxe'n tk'ab yi k'ak' yi tx'aklij ñchiwutz. Ma yi e' mas, yi qui na cyaj chitx'ixpuj cyajtza'kl, elk chik'ajabu' scye'j. Poro or quilu' yil cho'cu' tan chimoxe'n, yi quil chixomu' te cyetz cyajtza'kl...

Tan qui tele'n yi kachusu'n te ac'u'l



Ba'n xcon laps tan nojse'n yi mbi'tz na tzan jakle'n.

1. ¿Mbi tzuntz yi qui na chibanlij bautizar yi chinitxajil yi e' creyent te yi e' tal ni'e't?

2. ¿Mbit'z tajwe'n yil tocsaj jun creyent tan bnol tane'n yi bautismo? (credo)

6. ¿Mbi'tz yi e'chk balaj ajtza'kl yi ba'n kaxom te'j yi na jal tul Judas 1:20-22?

Tyoötu' tan xtxumle'n yi jun chusu'ne'j,
lok quiwixu' ta'n swutz tkan Kajcaw Jesucristo.